

إيه يا ضرسِي؟

إيه يا ضرسِي ..؟

إيه يا ضرسِي ..؟

جايّ اهوه .. و عليك بَمَسِّي

قُولِي إيه كان بس مِنِّي ..

لَمَّا تَزْعَل و تَخَاصِمَنِي ..

و ف يَوْمِين أَلَمَك قَاتِلَنِي ؟

طَبْ جَاوَبَنِي ..

قُولِي .. فِيدَنِي ..

أَعْمَل ايه .. طَبْ .. و تصالحني ؟

السُّوسَاية وِشْلَنَهآلَك
طربوشَاية وِجِبِنَهآلَك
قُولِي إِيه تَانِي وِ صَارْحَنِي

وِ السُّوسَاية .. مَش بِخَاطِرِي
جَت فِي جِسْمَك غَضَب عَنِّي
كَلْت حِلُو كَتِير .. سَا مَحْنِي

دَا أَنْتَ تَبْقَى حَتَه مِنِّي
وَف مَكَانَك زِي إِبْنِي
لِيَه مَغْلَبْنِي وَتَاعِبْنِي ؟

يَا مَا رُحْنَا كَتِير عَزَايِم
يَا مَا كَلْت مَعَاكَ وَلَايِم
عِنْد حَمْدِي وَ عِنْد حُسْنِي

ياما قُلت : دا ضرس عُول
لحمة يطحن .. عدس .. فُول
عُمُرُهُ ما يهْمُهُ .. مساعدني

مش شايفها بردو عيب ؟
لَمَّا بيقولِي الطيب :
إنتِ ضرسك مش عاجبني

ليه تَشَمَّتْ فينا شامِت ؟
ليه تَدَخَّلْ بينَّا تالِت ؟
يوجعك و يقوم واجِعي ؟

بُصِّ لآخواتك و شوفهم
كُلهم قاعدين في حالهم
مرتاحين و مَرَيحِيَّي

دا الي بهدلته و كسرتُه
إتحشى و خلصت حكايتُه
عُمره ما زيَّك .. حاسِبي

الحكاية فيها إنَّه ؟
واقع انت ف حُب سِنَّه ؟
قُلْت جَارها يروح ناقلني ؟

طب هنعَمِل بس إيه ؟
صعب دا الي بتحكي فيه
مش هينفَع .. غَصَب عَنِّي

مش هنتكَلِّم كثير
إنت بردو ليك ضمير
و انت بالتأكيد حاسِسي.